


平順縣志

貞



平順縣志卷之十

誥命



勅曰夫士也進著廉幹之聲退守止足之義此法
自應褒而况廉幹垂範於嗣止足錫羨於後若之
何緩追旌之命耶爾原任河南歸德府通判周欽
及戶部福建清吏主事一梧之父慈心雅度卓識
宏才製錦渭城流魯范之譽展幹碣郡著王顧之
聲歸三徑以怡情傳一經而開美爾子司珍有介
潔聲蓋爾清白之遺也茲用贈爲承德郎戶部福

建清吏司主事承晉錫以彌崇闡屯膏而永譽
勅曰夫木有根木有源獨何疑於芝醴乎錫命於
良臣而榮及其母所以返報泝源教天下厚也爾
仇氏乃戶部福建清吏司主事一梧之母躬修嬪
則動稱女師攻苦服勞襄我廉吏至其訓子手授
點畫口授章句卽孟機毆荻弗勞於此矣沼泚儀
亡柘棗澤在是用贈爾爲安人寵褒耀若斧之封
靈爽歆如綸之命

制曰士有宣力四方者朝廷固不泯其勞績矧能
廸哲於子屬以未盡之猷黃綬在前朱轡在後遺
謨有自而疏榮可後乎爾河南歸德府通判贈承
德郎戶部福建清吏司主事周欽乃直隸蘇州府
知府一梧之父學見本原才優經濟蜚英鄉籍展
采花封迨別駕於睢陽乃懸車手上黨當其守不
踰於一介行不愧乎四知剔蠹以威而豪強斂手
撫民以惠而黠吏寒心則已流咏於甘棠而見思
於畏壘矣卽古所稱循吏何以加焉宜啓嗣賢克
踵芳躅雖施爲未竟而繼述有光是用覃恩贈爾

爲中憲大夫如子官褒顯績於握蘭遙令謀於式
穀

制曰婦道含章無由自顯國家因夫若子而表章
之生不得珈封沒猶歆鼎祀恩至渥也爾贈安人
仇氏乃直隸蘇州府知府周一梧之母旒貞望族
儷美鴻儒井日親操佐賢勞於展驥詩書口授啓
闕閱於憑熊別駕流芳已徵婦順專城奏最越有
母儀是用覃恩贈爾爲恭人載膺綸綍之華永作
閨闈之範

勅曰世有闡修之士力學砥行竟賚志以歿者其
食報如操券而償疏榮辱寧有靳焉爾生員路崇
謙乃河南衛輝府淇縣知縣鴻達之父媿修永譽
素履無愆貽謀惟其一經式穀爰彰三異荷國恩
於錫類明天道之張弓是用覃恩贈爾爲文林郎
河南衛輝府淇縣知縣澤在青箱色輝玄扃
勅曰人子還念劬勞嘗痛心於風木之日故朝廷
務曲體其隱廣孝勸忠於是焉在爾王氏乃河南
衛輝府淇縣知縣路鴻達之母靜以能貞勤而克

儉宜室聞莒筐之謹訓子師熊荻之勞德被甘棠
思垂紫綵是用贈爾爲孺人幽璉載曉彤史常芬
勅曰朝歌負孟門太行之險環拱畿輔淇亦巖邑
也令斯土者非才守兩優未易勝任而愉快爾河
南衛輝府淇縣知縣路鴻達學躋通明志存砥礪
效彰儒席割試花封好惡必本民情威惠允孚輿
望郊餘馴雉庭有鳴瑟召杜遺風庶幾再見是用
覃恩授爾階文林郎錫之勅命夫吏治之衰患在
彰瘴失宜致令良牧削邑爾旣以循績著矣無怠
宦成爰有顯陟欽哉

勅曰婦德不出於梱矧共窮約之侶乎然黽勉有
素簪履可思則懿典所務並及也爾河南衛輝府
淇縣知縣路鴻達妻趙氏內則夙嫻婦儀克謹室
有齊眉之案奩無耀首之粧佐讀宣勞分鸞抱痛
是用贈爾爲孺人寵被龍章光騰泉壤

勅曰士能盟心誦讀靡不知簠簋當飾而室有交
謫則或以內顧奪矣故錄吏治者宜錫內階爾河
南衛輝府淇縣知縣路鴻達繼妻牛氏婉孌在躬

恪勤矢志主饋雅稱無遂從官聿著有終儆且襄
勤服縞砥節是用封爾爲孺人式煥六珈彌修四
德

贊銘

玉峽關銘

玉峽關者夏子叔焉而命之名也舊曰風門口在
隆慮萬山之巔爲兩河三晉之界蓋天作之險也
前此弗設守庸氓往往憑阻以拒命吏茲大非失
理與迺卽是關焉關成而系之以銘

太行盤盤橫厲中原近引海朔遙綴崑崙太原大
梁維國雄藩壺關林慮界於花園鳥道崎仄輪摧
馬煩怪石離列熊攀豹蹲連岬壁立屹如墉垣絕
頂中斷是曰風門俛臨夜壑仰逼朝暎一夫挺身
萬騎空屯設險塞國王者道存迺告闕吏爰作鍵
閣勒銘巖阿寵以瑤琨匪昧在德用戒器昏

虹梯關銘

玉峽關西來餘百里近蟻尖砦千峯壁立中通峭
峽狀如風門而小下則無底之壑石磴齒齒盤迴

平山縣志 卷之十
霄漢望之若虹霓然北歲青羊之寇虜負以拒汴
師者此也故號洪梯子易以今名亦因以關焉從
而銘

石厓攀天仄磴千迴仰干塞明俯臨蔽霾鐵壁勾
連豁衙中開觀者駭魄行子心摧亘如長虹橫絕
天階彼昏者氓肆其喧虺爰據培塿以抗震雷卒
於大刑亦孔之哀太行之阿大河之隈關門弗嚴
維帝念哉北山有石南山有材經之營之突焉崔
嵬侍臣作銘以詔後來

贊石公殉難

姚闓然

靈臺頁上

嗚呼我公學海淵源蔚起文宗造士濟濟振鐸雍
雍秉彛鎮密於穆清風廉已惠元德裕才豐興利
除害立法肅容捍禦水患疏淪歸洪調劑荒饑萬
姓懽騰琴撫九邑端沐化工廉訪循吏方期奏功
忽遭寇變四面環攻孤城失陷奮不衛躬願甘一
死勿傷黎氓賊亦義之束刃歛克寇退之後抱疾
而終紳士號泣里巷失聲胡天不吊喪國股肱風
颼颼兮雲慘愴鶴翩翩兮馭升良欲磔賊兮先遭

三川集卷之十
身抱幽魂兮恨未揚嗟羊腸兮茫茫異白鳥兮鏘
鏘想音容兮若狂咸出涕兮漼漼

贊斬貢生孝友

郭時正

潞邑貢生

上黨名宗首克忠兮西臺著績垂裕豐兮誰其嗣
之允惟公兮傳學弘才稟自神兮依仁仗義懋厥
躬兮丕承先志振宗風兮主盟斯文望倏崇兮皇
息忽被遇斯隆兮塵視圭組靡願通兮燕居庭訓
效冥鴻兮鳳毛耀彩媿河東兮蘭芽競茁老梧桐
今至誠動物頌有融兮大德格天佑無窮兮

祭文

祭忠節徐公文

邑侯高復興

日嗚呼惟靈間氣獨鍾芝山節義晉地神明一身
許國九死全忠罵賊不屈凜凜英風慷慨遇難城
破家傾既爲明死宜受清封輿情常在祀典永終

祭石公靈柩歸里文

于凌霄

靈台舉人

日嗟乎天地一遮廬兮尚傾歆於南東人生如浮
漚兮相乘除以何窮嗟哲人之死哀兮憶夙昔之
榮生鍾太行之間氣兮標三晉之蜚英少沉酣於

六籍兮奮桂黃而食萍隨振鐸於中鎮兮敷德教
於河汾既縉綬於赤邑兮沛膏澤於山城澄碧映
秋潭之清兮幽草含春回之露零胡陽九之劫運
今構茲士之災迤警蔽天之寇氛兮致循良之憂
忡乃靈民之不造兮胡延禍於我公方蒙難而守
正兮旋奉法而善終苦衷附燐兮甘作背井之鬼
寃紅化碧兮堪悲他鄉之魂形影歸寂兮遂爾寄
骸於蕭寺英氣不散兮自應遶繞乎故庭金閨寂
寂兮兩地洒死別之淚玉樹翩翩兮千里歸旅襯
之靈蒲關秦嶺兮岐路感傷衰草寒烟兮滿目淚
淋哀彼哲人兮實勞我心靈輻東旋兮慰我憂叢
尊靈不昧兮來格來歆

祭路公入鄉賢祠文

邑侯吳瑄

曰居家孝友處世和平清正爲品砥行礪名賑荒
恤難嫻睦謙冲濟困扶孤化俗息爭鄉里胥戴市
巷無競爲令中州卓異仁聲釐弊剔蠹以安民生
王國之楹邦家之珍生有餘慶沒有餘榮宜奉蒸
嘗俎豆維公况有賢嗣克振家聲余生也晚憾未

識荆承乏此邑景企高風爰詢輿論上請文宗秉
彛同好欣俞攸崇從祀

聖域薦馨彌隆今具薄奠聊竭鄙誠神其不昧來格
來寧

詩

題八景

青羊卧月

邑人申朝聘

北峙崇岡勝槩雄森森松栢護提封奇花豔麗天
然勝怪石層羅地勢隆滿眼春芳佳景異一林秋
色影疑同晴空遙望山形狀儼若青羊卧月中

邑人申以讚

雲岫崑嶺栢蔚芳遙瞻奇狀類青羊時逢五夜蟾
輝偃序屬三秋景趣長磊落山城依勝槩柔馴黔

首被餘光觀風問俗思良牧快覩堯天樂泰康

王升輦

谷邃蒼先羨峯危月上時綠蓑鋪白石喜殺牧羊
見

彩鳳儀春

申朝聘

面對南山似鳳翔翩翩躑躅覽德耀輝光魯儀大舜禎
祥現鳴顯文王治化長錦繡靈形棲盛地文明山
象類朝陽賢侯仁政追黃霸樂覩提扶慶聖王

申以讚

春山卉木郁英奇形色依然彩鳳儀勝景乾坤多
毓秀靈禽今古已呈祺琴堂再睹堯庭瑞花縣重
諧軒律彞翼我文明昭德象融融化日振昌期

路躋垣

把酒對南山嵐光翠欲滴儼然丹鳳翔照耀春筵
窳

赤壁懸流

安陽舉人孫德茂

漳水西來石斷邊急流落澗涌湍旋高懸素練舒
難捲亂迸珍珠散不穿玉露橫浸赤壁地銀河倒

瀉碧雲天年年幾度桃花浪無數群魚不敢前

黎城縣尹馬復

落澗漳流光皎潔流沿今古何曾歇依天寒發萬
聲雷就地冷噴千丈雪

邑人申銳

漳水滔滔日向東時當疏鑿見神功天開玉峽飛
濤涌地設金湯橫逝雄浪氣潮空猶霧障波聲落
澗如雷轟美哉勝槩堪遊賞題此令人興不窮

申以讚

猶與夏后導衡漳直向東流一派長雪浪滔天聲
浩蕩銀河瀉地勢汪洋錦魚無數遊潭底白鷺成
群集岸傍勝槩獨冠平順景騷人漫賦筆如狂

石鳳騰

欲效東坡愧未能神遊赤壁賦秋聲偕僧共語無
生法笑指巖前水一泓

龍門奮螯

邑人申以詳

巍然盤石枕漳隈龍卧遺踪特異哉奮起南山開
洞穴飛騰北海震雲堆一天雨露蒼生潤百代禎

祥赤壁培疑是地靈多孕秀故教神物兆奇煤

申 鏡

信步遊觀赤壁來
漳涯聳立卧龍臺
鱗文蟠曲依稀見
頭角崢嶸想像猜
獨萃精靈神變化
應留奇石狀崔嵬
幾迴登眺吟梁父
媿乏南陽濟世才

路帝由

屈伸潛見漫從容
莫咲寒岩噪暮蛩
試聽春雷驚蟄起
風雲會處躍飛龍

虹梯接漢

古秦徐元祉

飛磴懸梯引路長
彩虹高掛卧龍岡
雲根亘地蟠幽谷
月窟當天照上方
樵子丁丁聞鳥語
牧兒款款轉羊腸
一時有儻殊無備
便是九泥也不妨

路帝簡

太行有邃谷鳥道實摧車
對月星河近登巔雁影踈

玉峽通天

徐元祉

誰向班門詠伐柯
五丁削玉斧頻磨
九天闔闔開山腦
萬壑風雲起石窩
黑子莫憐斯地小
一夫可

備本兵多自從吳良諸爻動激切黃門縱兩河

牛倬

上鄙崔嵬甚羊腸鬼斧開路從雲裡出人自日邊
來

梵宇神登

申銳

矗突危峯倚碧空何年肇建梵王宮時聞寶地鳴
清磬日見香雲繞翠崧燦爛金燈光佛座玄微石
洞顯神功登臨殊覺非凡世疑入蓬萊境界中

路躋垣

蔓黨寶巖寺芊師靜掩扉涅槃遺脫骨舍利燦燈
輝寅夜珠光耀凌空螢火飛闔浮開眼界心地頓
歸依

登寶巖寺觀金燈七言古風

中州崔士榮

太行千里亘地軸隆慮西來巒峯矗嶺嶺下梵
宮開景相端嚴擬天竺玲瓏亂垂如倒蓮石龕空
洞似華屋棟宇追琢皆文章千佛萬佛駭人目神
工運巧如巨靈泉水涓涓繞佛足昔聞清夜現神
燈半信半疑心未服花朝携友一登臨詩囊酒盃

隨童僕曉行紅日上高岑俯瞰白雲滿空谷行行
杖屨近青霄寥寥塵寰真一掬半山雨落濕蘿薪
山上朝暾凝樹綠來來往往人攀躋香火朝神相
陸續轆轤千尺下瓊漿岩底行人消吻酷洞垂佛
手浴清冷頂偃古松蒼蓋覆平生癖性愛煙霞天
下奇觀可稱獨夕陽對酌發高歌近夜看燈試密
祝忽然對山一星明清輝晃晃如行燭須臾數點
起四山眼底澗中五燈簇乍明乍暗熠燿燿還遠
還近光煜煜分明出現摩尼珠龍女呈來照林麓
遊人大吃號佛聲果是山靈酌我欲僧人邀我坐
禪床手捧清茶奏梵曲細問此山開何時住持誰
者留芳躅云昔修定芋上人石窟端居虎自伏示
寂一性返靈山百年遺骨香如玉寶塔幽堂卧儼
然過客咨嗟盡瞻肅聖境須生聖者感梵天巍巍
表亭亭毒聞言不覺豎顛毛胸中愁煩消萬斛禪宗
我悟最上乘觀此佛靈莫敢續同行俱是青雲流
紀勝教子書東牘燈下走筆思若狂漫吟只恐大
家辱西山奇蹟滿襟懷歸家可作卧遊錄小窓一

枕醉春風清夢夷游伴猿鹿

宿寶巖寺

癸未春日

牛倬

巖間清夢醒
窓外白雲飛
理亂渾無覺
鐘聲入翠微

琳宮仙筆

徐元祉

岳陽曾醉呂純陽
未說雲遊到此鄉
海上有方延壽
考山中無曆紀
年光寒灰已剝丹
爐燼函筆空
傳翰墨香只恐一塵飛
不到更於何處產芝芳

遊靈顯觀

呂洞賓

素衣丘壑寄生涯
相近茅衡共幾家
卧聽松音臨水石
坐看山色老煙霞
林中有鶴窺來客
巖畔無人見落花
但把琴書消白晝
不須爐裏煉丹砂

次呂祖原韵

壺山居士牛倬

茫茫苦海實無涯
每厭塵勞愛出家
世變滄桑成夢幻
僊踪咫尺隔雲霞
逍遙晴日携村酒
寂歷春山對野花
倘遇題詩人
再至願隨鶴駕覓丹砂

題古蹟

錯斲遺渠

徐元祉

天造漳流塞未通重華遴選拜司空鯨侯妄竭南
山力禹聖終收東海功石上鑿痕千古異台端廟
貌萬方同徘徊不盡傷心事徒切瞻依幹蠱風

穿窬避兵

數萬甲兵何處尋從渠戟鉞氣蕭森漫藏虎豹山
中勢且伴魚龍水底吟諸葛有才生達走淮陰無
備僞皇擒胡如名將歸岩穴叨得留侯計亦深

築城聚米

所天在此樂無涯更羨伏波指畫嘉示弱其如多
減竈蓄威何必苦量沙樵蘇宿土空喉舌畫餅屬
人費齒牙相國勛名昭古昔好同勒子老兵家

禱旱靈湫

聖王昔日禱桑林責已憂民振古今赤土無過宣
地脉八荒何以變天霖料應野馬騰空久故遣神
龍沛澤深大抵山靈多有感權輿尤要在吾心

憇龍祥觀

龍祥琳觀拱仙靈端謂唐皇舊此經清濁總看漳
水合淡濃俱是潞山青欲窮遠目瞻宸極更上高

樓接杏濱好種芝田輕碧草鑑湖深處駐顏齡

邑侯關西王沛

龍祥高閣入雲霄宦客登臨興轉豪
漳水浪翻龍馬出大行翠聳鳳凰朝
未隨玉女採靈藥耻遇金丹生羽毛
平地神仙綠野雨掛冠歸去興醪醕

桂洲漫筆

二月過山城高垣碧草生野耕方駿發盜鼓罷長
鳴聖主思恭默蒼生喜太平寄言肉食者倉卒莫
論兵

卽事

西塘洛人

鵬殘遙試老萊裳栢葉樽前開幾觴今日太行雲
滿岫不勞迴首望河陽

煙火新成僅數家山城遙對夕陽斜十年猶擬黃
金穴遍地今開潘岳花玉峽千巖藏谷口虹梯萬
丈枕煙霞憑高依劔看北斗五色雲中穩翠華

題妙輪寺

漳堃李新芳

山門天畔起寶樹傍雲栽鳥去香仍在客來花欲
開慈根盤地軸法影蔭星臺鍾呂閣吟賞姮娥莫

浪猜

題南山井泉

潞州知州周 吳

澄澄一碧沁山隗老我經營亦偶哉石底混混原
有本源頭活活豈知來濯纓敢謂清風起洗惡還
令俗染迴自是聖功通海濱故教靈竇應時開

謁神農廟

梅之尹

細讀穹碑立廟文此方勝槩獨超群千巖樹映千
巖月一澗花藏一澗雲洞產石脂荒蕪合路經丹
水半山分蒸民乃粒無疆利鑿井難忘耒耜恩

題龍門山寺

蘇門孫 激

澗水激潺溪危峯百丈峭山僧道心真締構甚殊
紗殿閣開崢嶸丹碧互相照我來雖抱檝乃得塵
外笑秋聲起巖壑宛若蘇門嘯下步窮水源高攝
白雲嵩豈期俗士駕放目一覽眇微官安足榮歸
歟從荷篠

題石勒城

截律山峽間有地窄如掌雉得百二謀磽确非沃
壤胡雛姿相異圖慮似不廣如何蟻封微欲作南

面享孤城出雲層遺址尚十丈我來一把酒慷慨
追昔往崛起一奇才晉室方翫讎敢與南陽公逐
鹿中原上

題平順

長安孟 奇

誰城此縣化荒村百雉雄盤傍石根頭上奇峯擎
栢翠眼前仙閣動人尊東西遠澗通商路高下清
泉浸月痕廟議數年勞聖主欽名千古太行存

和前韻

申朝聘

花縣當年一野村而今松栢倚雲根風行蔀屋民
安堵日照琴堂令肅尊百里喜霽新德澤千家消
却舊兵痕召公善政今重見青史芳名世世存

申 鏡

新建花封易舊村盤環形勝倚山根青羊聳立雄
南極彩鳳朝儀拱北尊四境昇平消反側一方和
順洗痍痕當時不有潢池傲詎使星槎駐節存

申以讚

土寇當年據野村誰操利器斷盤根潢池鼠竊時
難久澤潞鷹揚勢最尊陋俗已更文物地荒郊無

復戰場痕太平景象元元順勒石提封百代存

申以詳

茅土欽頒鎮古村故家喬木永培根巍巍雉堞凌
雲朔赫赫雷封應宿尊溪轉山迴形有勢風移俗
易化無痕唯憐地春人笑苦願借循良撫字存

徐元祉

地撓三晉化天動六師移彩鳳存黔首青羊掃赤
眉昇平原有象大順詎無期共惜割鷄小牛刀大
用之

先聖廟

宣尼千仞坐蒼翠擁山巔教化原無類文明漸有
年一朝高鳥盡萬里大鵬騫造物及時雨雲雷啓
後賢

鯉泉亭

鯉泉泉下水一脉自山巔細流分燕尾空洞吐龍
涎液浸金盤菊香回玉井蘭明通公最溥民物養
天年

題溫泉

申公諱朝用號溫泉與元祉交善喜其
祖孫父子一堂晚翠故贈以二絕云

溫泉泉上讀書時公祖臨流飲一卮更喜絲苓松
上下盤盤山澗浸琉璃

溫泉泉涌接天河一派流源萬頃波福澤有田從
灌溉寸心留與子孫多

贈蓬萊中翁

橋梓年來道始尊時乘皓鶴上崑崙悟真罕得修
仙地餘慶偏臨積善門緣醞三五延月島黑甜一
枕卧雲根森森蘭桂椿庭發不說桑麻長子孫

御史臺

驄馬代天巡激揚實所賴三尺法當提一文錢不
愛蘭台雨露馨栢府風霜耐須識御史箴識箴真
解豸

觀音閣

雲林只隔城上有觀音閣一線路遙通萬屏水遠
落青松蔭石泉碧草封岩壑雉兔與芻蕘偕民真
可樂

彰法寺

彰法何年建浮堵插翠微客登青玉案僧卧白雲

扉刹古鶴驚舞林深鳥倦歸谷空風鼓腋直欲逐
天飛

羊井舖

盤盤山幾盤絕頂浮雲過古道紫驢嘶上林黃鳥
和常云行路難髮止郵亭坐杯酒聽絃歌花封人
久卧

養濟院

西伯澤枯骨惠鮮先此民有周寧繼富無告始稱
貧陰積冥冥德陽回煦煦春施恩於不報天降石
麒麟

明倫堂

吾道無古今幹旋歸大造舜徽五典精孔立千言
與魚躍自淵淵鵬搏從浩浩惟師為善人萬世關
名教

薦福寺

薦福名蕭寺禪和誦法華蒲團栖弱草蓮炬落寒
花路僻雲生頂山高月吐牙虎溪今又遇塵蹟半
天涯

二仙廟

神堯多感速雙節練昇天辟世聞毛女凌波見水
仙萬靈禧母娠一孝動人傳不是瀟湘景啼痕化
杜鵑

元帥墓

一坏土為誰云是劉寬者鬱鬱自佳城離離忽稟
野石麟卧道傍蜀鳥啼林舍千古吊英雄英雄何
去也

清涼山寺

華州王榮誥

清涼隆聳萬山頭傳說曼殊大士樓無象包羅金
色界有天展放玉光眸涌泉疑是蓮花井林木應
為蘭若丘中見焚修玄度者兀然高坐樂悠悠

前韻

申朝聘

登臨直上峻峯頭瀟灑清涼佛氏樓月照翠華光
四聖雲開靈鷲豁雙眸禪林樹影搖青漢岩畔泉
聲傍綠丘勝境招來仙客駕王喬飛鳥樂悠悠

登王庄觀音堂

王榮誥

山頭陡起一神堂別是菩提小上方了得恒沙真

妙訣爲傳寶藏悞玄陽蓮臺福地黃金界苦海人
天白玉鄉此內焚修剃度者不知能否泛慈航

次韻

申朝聘

香風引我栢林堂地僻清幽擬上方路入洞天尋
穆滿時逢仙境慕純陽丹砂熟煉黃花地白日高
留綠野鄉羽客登遊雲外望勝他身在濟川航

九日登彰法寺

邑侯利津王甲

山隈嵌古寺依寺樹崢嶸峭壁開青嶂平林浸綠
泓雲深猿徑杳風急鳥翊驚把酒登高賦忘歸步

月明

教諭懷慶賈希哲

佛宮高拱碧峻嶒節屆重陽拚眺登峻嶺何歎吹
帽客佳辰堪賞獻麩僧穿松枝蓋沾衣滿對菊花
香撲酒凝寂寞法堂陪一醉還邀明月共爲朋

遊海會寺登虹梯漫吟

崇禎庚辰

石鼎臣

曲徑盤旋直接天梵王宮闕白雲邊兩山翠滴袈
裟冷一道溪流几席泝花落鳥啼僧舍寂香清茶
熟客亭宣幾度坐來塵念息願拋書劍學金仙

遊龍祥觀

申鏡

蚤過琳宮訪道人丹梯直上近星辰清虛本自塵
來少勝槩偏令客到頻華藏年深遺鶴羽石壇歲
久覓龍津我來不爲黃庭事聆得仙風一段春

題平順縣和壁韻

同知衛人靖四方

翠巘千章合青羊百里開重門通澗口獨郭依天
隈燈火亂星月車蹄奔兩雷莫驚雲卧客道是採
芝來

登妙輪寺

尋芝那更怯峻嶒寶寺名山縱一登烏道千盤雲
外轉珠宮五色日中凝情知瑞產須靈地欲探真
源有慧僧借問佛王曾藥否也能不滅萬年燈

望南山祝關聖祠

咫尺鮮芝何處尋遙瞻關廟柏森森當年忠義傳
青史此日英雄仰赤心天地似應生氣在山川時
有赫威臨今皇自是多恩典好遣靈根產碧岑

青羊歌

當年草寇潛青羊天威剪威明綱常鋤茅復與修

城隍師儒聯屬與文章
掄才擇牧弘琴堂
黔黎四野樂平康
三十餘載花封香
山川拱遶生輝光
我來駐節咨循良
能完賦稅消強梁
惜教百堵圍荒涼
民乏棟宇多穴藏
田不成畦水遠將
曾誰種麥蠶株桑
恨吾無力荅君王
願與守者番甘棠
寬刑薄用懷流亡
焉知山城不復游
羲皇

採芝行

東望青羊枕太行
長松古柏垂蔥蒼
石城一竇通霄漢
俯窺群壑烟嵐藏
鏗鉦鼓吹連雲嚮
會凌絕頂開清賞
美哉萬朶芙蓉攢
攀躋擬倒仙人掌
遙看燈火下長空
忽聞天半傳疎鍾
虎蹲豹距穿竒石
乘風直欲追仙蹤
更道靈泉迸山井
呼瓶汲取烹山茗
飲餘旋覺精神清
更問此山似何境
千載天台隔世塵
無復菟園能渡津
幽深彷彿商山曲
顧予不是茹芝人
不如却自頻來擷
爲捧丹衷獻丹闕
愧伊但作山中人
常向山中醉明月
禱雨有感
邑侯關中張思聰

平順之山山多石
平順之水水不足
平順之民民

食糠平順之婦婦不織嗚呼噫嘻歷屨厥土不可
耕而食者十之七歷狀厥苦遍四海九州而不能
以如一衡漳競渡適予公出遇彼農夫觀彼猷畝
夏既秀而未實秋方播而欲枯予心之惻惻入骨
民心之憂憂若哭端午良辰率我僚屬洗心祝神
神乎聽吾油然雲興沛然雨足民欣欣然有喜色
而告我曰雨澤盈野三農有蘇予遂放民歸田聊
備三牲酒帛謝神念我平順之民多難乃感神功
之速

登王庄觀音堂嘉僧龍山孝行

饒九卿

百尺巖頭大士家虬松冉冉落殘霞山門霧薄藤
翻浪鉢底塵幽鮮迸花山老雲深僧亦古事師行
孝多辛苦菽水慇勤五十年行脚堪傳釋家譜刀
圭度日作生涯利物神功分外賒閒時採藥南山
上白雲片片點袈裟褫袒如同戲彩衣晨昏無間
悟菩提大士金針凡幾度度得山僧永孝思

登邑南山

邑人申汝齋

閒步登高日已西山林佳趣少人知寒鴉戲水溪

前噪野鶴留春澗下啼綠柳橫垂丹鳳尾青松倒
掛老龍皮遙望歸來渾一醉不知揮筆寫新詩

九日之旋泉遇雨

邑人申惠民

中元九日去東征既遇山程又雨程遍地千花成

段錦連天萬樹鎖幃幘東西不識行人路南北惟

聞飛鳥聲疾步登高極目望恍疑身在五雲峯

伏羗紳士送王公去奠二韻

併引

王好信

伏羗舉人

古稱三不朽曰立德立功立言然德不足以

被蒼生功不足以奠社稷言不足以關世務

其欲不朽也難矣惟流風餘韻沁入既深自

有不朽於人心者在也若吾邑素號煩劇之

區士風民俗澆亂幾不可究詰惟我公以上

黨英才一游刃而剔煩解弊翻然丕變庶其

有瘳乎既而以丁艱致政士民所留柰賊寇

薄城怒然抱如燬之痛適奉 聖詔車騎入

撫屹乎廣陵之風士民遂安堵如故其尸而

祝之社而稷之豈可酬高厚於萬一耶於是

竟以安寇東行促駕時猶惓惓以勸農為言

止兵為事其視民猶子徘徊難割第以忠孝
念迫知不能戀戀於茲土然雙鳧既飛遺愛
猶存指日萑苻息鼓綠林賣劍而措天下於
太山之安寧值一邑哉好等久沐化雨仰止
之思何忍一朝離去豈緩數聯以誌不朽之
意云

來暮歌方頌五峯觀星早識使臣前綵綸遠引兩
河月沛澤空留萬井烟紫氛關結龍已去瓊聯玉
笋鶴初還腐儒無學揚宏德野老備能極口傳

陽關徘徊送車塞士女攀轅轍莫前一騎征騶冷
塞月半肩行李帶淮烟異中無計留君去渭上猶
思借寇還不盡瞻依懷舊德甘棠遺愛倩碑傳

贈王公秦魯兩任偉績 西華縣令邑人 王鎮寰

青羊彩鳳極千尋山岳鍾靈知是君東魯清風歌
麥秀西秦化雨續棠蔭功高盤錯塵氛靖節矢忠
貞草木欽平水應推真俊傑斗南仰止正多人

桃源梯支公碑碣 嘉靖中丞鄰人 烏如居士吳定

武陵曾到神仙宅又過桃源隱士家天路有人皆

種樹春山無處不飛花六峯連袂開屏幃二水雙
翻燦錦霞空谷蛩音通上界乘風時見五雲車

次前韻

壺山居士牛倬

桃源道有神仙宅聞喜支公雲惠家一逕通天施
鬼斧半崖懸塌玩山花烹茶風送岩頭瀑服食時
食谷口霞羽士幽棲渾百歲世人漫自說推車

署中自感

石懷玉

日暮桑榆景色敷雕殘骨幹尚堪扶心因形役空
憔悴事以時艱半菱枯日月光華枝上影乾坤今

古卷中圖從中展出經綸手黼黻皇猷翊帝都

喜久旱得雨

邑侯高復興

乍響疑雲磨旋驚山水鳴濁波奔巨壑怒石震孤
城久矣池泉竭須臾甕釜盈援琴歌解愠一縣動
隴聲

和鄴壁舊韻

邑侯吳瑄

士女方欣日未斜紛紛流庶又還家池塘碧綠注
千尺山逕新栽幾樹花

課藝談文到日斜倫堂美負壯天家數椽書院擬

新築留待潘郎好種花

剪棘披荆到日斜墾荒柞芟是田家山原隴陌多

如許餉婦歸來插滿花

和前韻

邑侯劉 徵

曲徑崎嶇步步斜登峯四望少人家幾回度嶺心

先怯懶看無情滿地花

深秋碧影鴈行斜音信難憑遠寄家牢落半生徒

自苦參差辜負故園花

繪愁吟 八首并序

邑侯劉 徵

平順古青羊山嘉靖年因草寇陳卿嘯聚剽

掠會兵討平之子鄉夏桂州先生疏請於朝

割黎潞壺關之地增設縣治迄今三百五十

年矣三里之城原少其二十室之邑幸多其

四舉目皆可憐之色乏泉無生聚之由自愧

素不能詩然而情生於中感物而動矧所見

所聞朝夕於斯猶之寒蟲之吟不自覺其鄙

俚爾

城郭

壘石依山作縣城一梭半月好描形晨興煙突飄
踈影漏盡鷄鳴只數聲敗舍頽垣閑扃戶荒郊舊
穴破零星舒眸寥落行踪少前後高峯自送迎

土地

賜名設縣肇何年草寇縱橫聚遠巔割地鄰封皆
棄地前賢臆見累今賢井田誰可分區畛阡陌幾
能沃壤連亂石峻嶒懸磴級層層荒岫吐嵐煙

人民

曾天之下莫非民此地投生苦更貧山瘠菑蕃無
厚穫水窮播種枉工辛鶉衣百結垂絲絮藿食連
食雜柳秦正賦輸將如析骨難圖鳩鵲達 楓宸

風俗

穿山編棘卽人家不事蠶桑與布麻形穢捉襟多
見肘頭寒破帽半生花逢時餽客方炊黍刮水連
泥絕勝茶習懶別無生活計喁喁歡笑泯咨嗟

士習

叠嶂嵯峨豈乏奇甘心林壑亦非宜布衣皓首寧
終隱負耒橫經若個稀杏苑從無題姓字鹿鳴都

是別聞詩潛修莫逐隨波靡誰道青雲不可期
廟寺

孤村古廟半荒殘剝啄蓬門夜不關人過膽寒防
虎踞月移光影照神顏塵封座上憑風掃草積階
除待火刪建築依稀年代遠當時民力想餘閑

衙舍

蕭蕭官署冷如水啞啞枝頭鳥自鳴欲卧祇緣心
未靜資生常嘆口無腥閑窺胥役搔蟣虱渴待新
泉啜茗茗八座須臾席不煖幾人有事到公庭

宦况

爲官無計學爲僊採藥深山幸引年丹鼎養成頰
點石雨暘符召立回天五丁併力開蹊徑章亥馳
神運米鮮到處呼泉隨劔湧猶愁意外有排連

感桂洲夏公建縣

司訓張汝衡

授訓山城歷數年爲因憑吊夏公賢祇乘險難拯
危地懼辱宸憂畫縣前玉峽虹梯屏作壁青羊彩
鳳石通泉士民戴德僉承祀躋列馨香名遞傳
續孔公重修城垣

半月懸山局作城昔時民舍漸凋零既為明寇殘
愁苦復拂君恩恨益增豈獨富人難掩聚就令貧
者曷藏形舉頭城迹堪惆悵陳說情由不忍聽

咏靳處士積德賑荒

郡人韓城

西河衍派慶流芳積德惟公厚且長喜賑貧窮遵
曲沃雅敦孝友景汾陽邑侯額賜仁賙聖士庶群
稱君子鄉誰謂皇天無降鑒至今奕世有書香

文昌宮落成示士子

邑侯杜之昂

文昌宮殿翠微開遠近煙光入望來朗與山城增

氣像憑將文運助栽培仰瞻道範真如接捧誦遺

文豈用猜人事盡時天事合冥冥自古號憐才

題羊井驛亭壁

時余兄宰平順

杜之叢扶溝舉人

路入青羊石磴斜前瞻兄署即吾家郵亭坐聆松

風古絕勝河陽桃李花

登青羊南山

時余會試赴都

前

冰衙對面翠屏開拄杖直登絕頂來石磴雪殘留

虎跡峯頭松老結龍胎行山西望分千壑漳水東

流曲幾迴遙指帝京層嶂外振衣長嘯暫徘徊

邑侯杜公實政五十韻 黎邑庠生高垣雯

聖朝重治績加意在民牧平邑杜夫子矢心清且
肅四知無愧畏一室凜幽獨公昔曾署黎萬戶同
尸祝累詞懇上臺乞留重且複恨爲例所格父老
通額蹙我知公最真况有實政錄畧陳數善政是
人所共蓄淡泊足家常日用惟蔬菽依然閔仲叔
豈曰論口腹整躬與率屬神君照部屋民隱罔不
知案曾無留牘人飢由已飢便宜發倉穀止知民
性命何曾虞禍福揮洒遍閭里不俟文徃復收養

孤與貧日每給饘粥更憐號寒人冬月賜衣服歲
歲以爲常盡是捐俸祿賣兒貼婦者嗚嗚聲吞哭
公聞慘不忍贖取歸其族嚴禁鬻子女團圓聚骨
肉息訟慎刑獄清操格吏僕役不下鄉呼經年絕
鞭朴忠信與明決發奸並摘伏豪惡有所畏相率
爲親睦况復敦詩書公餘猶誦讀聖諭十六條傳
宣遍山谷義學延師儒青莪弘棫樸旌表節孝門
回光榮草木草木昭回光虎豹潛踪藏不必效埋
輪當道絕豺狼憶昔弘農守猛虎渡河走我公亦

如是赤豹來授首潮州韓刺史驅魍只一紙後之
視今者猶今視昔耳上黨元靖公擒虎不需兵但
馳一介使居然縛大虫昔時長子令今日平順公
流傳載明宦蹟赫同烈風烈風誰不道原非阿所
好公論自在人誰焉容假造龔黃與卓魯循良傳
千古自有我杜公前賢可並數吁嗟呼賢哉願將
實政達宸京特簡名臣佐聖明父老不須憂蔽芾
他年霖雨慰蒼生

殪虎行

頌邑侯杜公除

黎邑學生高漢震

上黨原據太行嵬中有彈丸號平陸倉松翠柏滿
山麓穴潛虎豹與狐狸石城內外常乏水民舍在
右棘纍纍天監此地民弗堪特簡杜母撫嬰兒初
履此地心悽惻飢者哺之衣赤肌公家陳留饒綿
花織布挾擴施彤衙窮谷男婦聞此語襁負至者
幾千家時有流民路植槐鬻子而去悲呀呀公代
贖還且廩餼仰事俯育免容嗟代庖黎地四閱月
攀卧遮留爭竭蹶問伊感恩何至此王浩鬻女復
有子公之仁政固多端團聚骨肉尤足齒山城崎

嶮高復底南山文豹來成蹊始則搏食豕與犬繼
且逞威驪與羝一城震動可奈何棄耒而入守深
閨公迺毅然引已過走筆抒辭走山阿倏有山靈
是夜至云斃此豹不用戈詰朝獻來赤墀下使君
睹物知非假公寤語人笑且癡自今虎豹不用打
爨烟朝隤日漸高柴扉半啟未敢號忽有樵者數
輩回驚傳山徑昇豹來公爲升堂一審視夜夢不
爽何怪哉遐邇聞之皆駭異聰明正直兩無猜昔
有崔君一介能戮虎廟貌巍巍耀千古我公今日
一紙能殪豹神君奇績快目睹自此豺狼不當道
自此狐狸不晝遊自此山陽可放馬自此桃林可
歸牛公之大業勒鐘鼎公之口碑在童叟平邑友
人曾聯床班班善政述甚詳惜無健筆能揄揚聊
紀梗概志不忘何日策蹇走青羊暢言勒石銘高
岡庶幾哉千秋萬歲今皆知太行之上彈丸小邑
有龔黃

墓誌

高平邵 炳

欽國上將軍分治潞州元帥府事劉寬重修故父
 許事墓誌竊以幽明之際有感則必通行止之間
 在人所當慎雖死生由命富貴在天亦人之積善
 所兆也故於公多積德謂後世子孫必興者良以
 此也昔元帥高祖諱興曾祖諱福祖諱德悉以農
 業傳家父諱廣居以孝友為先行以廉讓為上見
 利則思義臨財不苟取積而能散賑恤貧之以孝
 廉舉授以許事有政績嗚呼風樹不停竟以天壽
 終時年六十七母王氏純篤貞潔善事姑舅人以
 孝稱卒年六十六合葬於故里青羊西山阿先塋
 適丁金國衰微戎馬橫起時官以元帥良家子領
 總軍務出入戎陣之間往來鋒鏑之下銘心忠義
 生死以之聖德序勲榮加品秩特授潞城縣令三
 年考績上上遷潞州節度判官以政有聲復遷潞
 州節度副使兼總領本州兵馬事已而金朝失統
 神鼎遽遷社稷丘墟矣遂故仕天朝承恩復授潞

州元帥府事因率本部官屬監軍李仲韓資招撫
 事王勇王清張使郭祥劉垣等來歸桑梓反袂家
 園翻覆徊徘徊庸心痛首追思向日帥旅之間捐軀
 致命萬死一生豈期得致今日哉是以榮萃非人
 所能必實賴神明嘉祐前有積累陰有維持者焉
 乃設奠致祠經營於丘壠之間開展於松楸之餘
 觀風水之來路方隅界植非復曩日舊也乃命其
 都總領姪長日泰次日會俾芟夷攘剔呼水招風
 益新而復完矣請予誌廼叙其實以為銘

銘曰

元師先考兮爰宅於斯傳業於農兮蓄畜以時大
 田多稼兮有庾如坻散財施粟兮賑乏賙饑陰修
 厥德兮外不求知朋友切切兮兄弟怡怡天道昭
 昭兮日監在茲報應於人兮影響期隨為善為惡
 今審謀思惟毫厘不爽兮戒之戒之

徵仕郎德州判王公暨配孺人史氏合葬墓誌

劉四科

隆慶壬申之冬王孝子極持學博馬君為其先考
 鳳山公狀詣余請誌銘余惟鳳山公曾署紫陽事
 而知余最蚤出其子曰極曰楹者與余為友蓋以
 是得備聞公之懿行云余茲筮仕上黨獲近公之
 故里方以吏治纏迫不獲哭公於柩所乃承誌文
 之請寧忍以無言辭耶謹按狀公諱濟美字世甫
 別號鳳山其先潞城人嘉靖中青年之變割其地
 為平順縣遂為平順人曾祖誌祖昱俱有隱德弗
 耀父仲銘任淄川丞世稱為循吏母靳氏申氏生
 二子長日河次日公公靳氏出也初公為兒童時
 穎悟絕群即解聲律諧詞章稍長益博習群書選
 為邑庠弟子員天性孝友事淄川公愛養委曲終
 其身不衰其事河鬼又甚謹居常聚徒講學與世
 之逐利者不相涉人或貧不能自周即出所有分

之不責報效人尤首先德行故里中魁奇之士多出其門蓋士類之宗仰云嘉靖己亥歲以貢如京師試禮闈不第遂授臨城簿起疲振弛持米茹蘖方為當道推重未幾會淄川公卒即奔歸哀毀骨立一遵禮制服闋改授寧陽故衝煩兼歲值大饑公洞悉民隱益加意賑恤之自是竄者返穢者治卓有成績為上下所加悅尋奉例裁革冗員復改公褒城簿下車即部運軍儲清理屯壤每事輟效監司知公賢遂委署篆紫陽先時紫陽以流賊之亂改徙城垣居民散處逃亡者眾公即修葺城堡畫立市井分地授民招撫流移瘡痍離散之眾復雲集星列成一完邑矣時大中丞右山裴公因署紫陽有效又借公署西鄉其善政得民類亦如此無何上用台臣薦擢公為金鄉丞金鄉多闖宦號稱難治公不携一妻子風裁凜凜毫無假貸故闖宦咸束手不敢橫行邑故事有濟寧河閘之役民甚苦公廉知其實令民伏闕上疏乞免上可其奏故邑中歲省費千金皆公之德也嘉靖乙丑冬濟

河告塞上命大司空朱公亟往濬之朱乃檄會諸縣長吏議其事或有以公薦者檄公至公指陳可否如指掌大司空喜即署公於幕中不數月而水復故道帆檣蔽江事竣又擢公德州判官於時徐沛漕交之間聲名遍起望公大用以為蒼生福曾為幾何而訃音至矣蓋公殫力効職勞憊積神竟以宦邸不起傷哉謂之致身報國者非耶其卒之日書履之外囊無片金男女哭於途縉紳奔於道司空聞之大慟曰此官吾方欲破格用之遷今逝耶遂命諸司厚襚之既入名宦以旌其能仍又核檄原籍從祀鄉賢以永勵世風云公歷宦凡五處所至悉圖形肖像樹碑立祠自古佐貳之得名未有如公者焉公配史孺人邑耆福寧長女孺人性貞淑不事粉釋日惟勤織組以治家姑病亟即焚香告天願以身代縶然有烈女風故世稱公之立名其得於孺人贊而成之者多矣公四子長曰拔娶馬氏先公卒次日祭娶張氏繼娶陳氏三日極娶馬氏繼娶牛氏四日楹娶廉氏俱邑庠生一女

適生員程汝桂孫男象賢齊賢極出惟精惟一榮
 出樽賢燦賢炤賢光賢榮賢楹出公生於正德壬
 申七月三十日卒於嘉靖丙寅八月二十四日享
 年五十有五夫人生於正德丁丑正月十三日卒
 於隆慶辛未十二月初六日享年五十有五隆慶
 六年十一月朔八日合葬於廣裏龍留之原新
 建兆也公之德業已詳於方伯趙公前誌余僅括
 其大畧而銘之銘曰維公之才出經入史聲能動
 遐名不遺邇維公之德杜母召父天監四知澤延
 五路維公之配琴調瑟和後公而亡之死靡他行
 山蒼蒼漳水洋洋同壽同穴萬年永昌

西華尹王公墓誌銘

平萬心盡邑貢生

嗟乎人生住世誰能百年苟有足傳不必大耋矧
 德業兼隆教躋古稀乎是可以不朽西華尹王公
 矣按狀公諱鎮寰字心寧別號澹遠平順王曲里
 人高王父恭賢生進朝曾焚數千金券以賑饑進
 朝生嘉賓有聲成均嘉賓生三錫公之父也質實
 無械賓諸飲射母石氏內外合德有古梁孟風公
 生而端慤甫成童即知向學早歲失恃哀毀備至
 繼母路氏河南淇縣尹允升公之從姊也性固慈
 公由盡子道益成其慈忘其非離棄也未弱冠劉
 孺人來歸孝敬兼至助公力學學既通拔為邑庠
 弟子員禮刈陵申文毅子為師得文行宗每構一
 蕪必堅確老到八理憊心乃止不苟就也其誦讀
 聲每與雜聲相唱和同事諸友畏其志專力強皆
 遜為不如也比食廩攻苦愈篤居恒自視粥粥若
 無能不以學驕人兩執大喪必誠必信勿之有悔
 耆宿公之卒也諸弟澤寰等尚稚公撫養提携婚
 娶得至成立計拙經營力耕以供饘粥有淡素黃

花節清虛藁竹心之句時吟以自礪屢走場屋竟為朱衣所妬

大清定鼎首膺經薦授平陽府洪洞縣司訓勤考課
數品行不問束修多士向風如晉子庶鄭子向登
鄉薦捷南宮者皆在陶冶之中至捐俸金以修學
宮諭豪氏以清學田公品評以裁邑乘實蹟可紀
巡方伊公薦其賢云淳文變靡雅望式浮疏章聯
上遂陞河南開封府西華縣尹瀕行之際洪紳士
如盛繹絡不絕揮淚不忍言別如霍州之士失月
川先生也西華殘敝之邑百務廢弛公加意撫綏
不事鞭朴招流移清賦稅勸開墾嚴保甲飾學宮
迪多士華人頌其仁而華也且躬操鍾以築水口
民免為魚用木皂以代勾攝村無犬吠華人頌其
勤而靜也清六七人未清之疑獄寃民得釋定二
十八勘未定之爰書巨寇授首華人頌其明而斷
也却例魏數百之里金民無額外之擾豁舊令累
年之積逋吏有旋里之樂華人頌其廉而義也暮
年拮据心力俱罄頭顛星星者漸多矣後以柳蒲

不敷係未任以前事職河廳者以此有求於公公
曰欲得上司歡可令百姓哭乎不阿其意遂以此
短公而罷公公拂衣去竟不辯華人依依不舍攀
轅卧轍如去洪洞時也比歸來問水尋芳陶然自
適與自寧公情好浹洽不啻同胞且以道義相砥
礪後遭疾夢與申子遊疾遂篤所囑者皆道義言
不及於私歌正氣歌而終於正寢公可謂見定而
臨危不眩矣公生於明萬曆己亥八月十一日西
時卒於今康熙七年六月二十九日寅時享年七
十歲元配劉孺人生於萬曆二十九年正月二十
一日卒於順治五年六月十二日享年四十八歲
今之視含歛者為秦氏繼孺人供內助副室閔氏
卒子二長端臨邑學生娶趙氏黎邑庠生文傑女
劉出次世臨邑庠武生娶高氏黎邑庠生雲齊女
閔出女一適邑學生靳之傑劉出孫男二一發祥
娶工部都水司金漳李公女端臨出一辛酉世臨
出孫女三端臨出者二一適黎庠學生李士奇子
一適黎庠生李蕤子世臨出者一適邑學生張弘

化弟於康熙九年三月初三日塋於河灣之三台山新甍也窀穸之前公之二子杖經揖余異誌公之生平以銘諸石非無如椽可托余與公處最久知最深余不銘誰當銘者銘曰爲士不愧乎士在官不愧乎官既兩者之不愧乃可以對乎申子而無慙顏勒真珉以載懿行異不朽乎萬年

平順縣志跋語

從來有非常之人始可建非常之業歷攷遑籍如義戡文周孔之人而大易以著如左轂班馬之人而列史以傳何莫非以至人立至言哉平志自山左趙公纂修後迄今八十餘年矣其間

平陽縣志 卷之六
五言詩
饑饉兵燹迭相為崇無論家藏
者化為灰燼即梨棗數片亦
付之祝融一炬丁巳歲南州

劉老父臺以文章名世來撫茲
土甫下車即問民風詢利弊
舉從前之戾政痛為釐剔六
載之內利無不興害無不除
輕徭薄賦慎法省刑善政善教
悉本清心寡慾為敷施民生漸
遂民性漸復一日聚升等命之曰

地方之事頗為就理獨是邑乘
未輯無以應採風者之求寧非今
日之缺典與盍共為圖之升自知
樛櫟菲材不能董狐一世第以父

平山縣志 卷之四
召無諾義不敢辭乃携諸庠生
搜獲草澤之殘篇考夫歷來之
翠琰並訪及耆宿之記聞傳說
義士之迹稽博採者分爲十卷列
爲六十目悚惕以獻而

父臺欣然任裁正焉爲時僅三月而
厥志告成升等因是服

父臺之嘉惠青羊者不止在文獻實
有不可磨滅之精光布在方冊者
可以吐豪俊之氣可以揚處士之
眉可舞幽壑之潛魂可發深閨
之怨鬱書行矣

父臺之德之才且將與平之河山同流
峙於無極矣升等幸附驥尾亦

得叨沐餘光其遭逢抑何隆乎
所謂以非常之人建非常之業
者其於

父臺洵有當焉爾謹跋

康熙壬戌年仲冬穀旦致仕代州學

正王升輦撰



平順縣志後舊序

夫志曷爲哉昭實錄也稽古周
官以圖書掌記降及列國記事
表年皆史也今之志是已可或
缺哉我

朝列聖相承纂修大備典籍所著
視古加詳故疆域所有按籍可

攷如列眉指掌然以一統志與郡縣相表裏采輯備故紀載詳也蕞爾平順雖繇芟夷悖亂之後輻輳而成及考其實居然一邑埒也自建邑以來志已有著緣爲掌籍者所遺致有殘缺者失次者久不足以備觀風者之

采余甲辰夏奉

命承乏茲土復緣按部者索觀卽構遺書檢閱爲更修計猶有畧而不詳誕而不經質而不文者固不敢以不修而廢墜相沿尤不敢徒修而簡訛相襲也乃訪諸先達有申公者以文學政事

擅名於時其子姓亦彞賢於邑
之故實必能識其大小因造其
廬而禮聘焉公亦慨然身任其
事據古傳采群議揆精據思據
事屬詞越月而成帙卷分爲六
目列四十有五以縣境附之輿
圖而模擬工以邑名沿革星野
疆里城池景蹟山川形勝鄉村
市鎮風俗土產屬之封域而區
畫周以縣治行署學校官職壇
壝寺觀塔墓橋梁舖舍關隘布
之建置而紀錄備以田土稅糧
戶口差徭統之賦役而綜核明
以科貢武秩雜職賢良孝義貞

烈隱逸仙釋彙之人物而品隲
詳以制誥碑銘詩誌行歌括之
藝文而識述備膾分臚列井然
有條向之殘缺者補失次者序
簡畧者詳不經者正不文者馴
雅舉斯邑幾墜之典燦然復明
一邑之文獻備矣而豈徒哉將
俾後之人撫輿圖則思慎守歷
封域則思經理覩建置則思修
復考賦役則思優卹稽人物則
思景行徵藝文則思誦法觀風
望治恒在斯也厥係詎不重哉
厥係重故厥工當竟茲志已就
緒不可無言以著簡端闡郡有

周公者學富才雄班馬史筆也
因微其言爲是籍光至鉅梓以
永其傳摘詞以附於末者余事
也亦余責也乃媿不能搦管屬
文惟錄其實以贅

萬曆丙午歲夏四月念日知縣
事古齊趙完璧甫誤



